

Ureztapen Planerako 75.000 milioi pezetako gastua iragarri du Nafarroako Gobernuak

Nekazaritza garatzeko ubidea «ezinbestekoa» dela dio Perez Lapazaranek

Jose Cruz Perez Lapazaran Nafarroako Gobernuako Nekazaritza sailburua atzo Parlamentuan izan zen, HBk ureztapen planei buruz egindako galderei erantzuten. Ikerketa berriak aurkezteaz gain, Nafarroako Ureztapen Planaren berri eman zuen: datozen 20 urteetan gauzatuko da eta denbora horretan 75.874 milioi pezeta gastatuko ditu Gobernuak ureztapenerako 54.000 hektarea martxan jartzen.

T. SATRUSTEGI / IRUÑEA

Nafarroako Ureztapen Planak Gobernuaren eginberrara zehazten du datozen 20 urteetarako, hiru arlotan: dauden ureztapenen finkatzea, ohizko ureztapenen berrikuntza eta ureztapen berrien sorrera. Ezarritako helburuak lortu ahal izateko hainbat urtegi eraiki beharko dira Nafarroan, horien artean Itoitz, ondoren Nafarroako ubidea erabiltzeko.

Dauden ureztapenak finkatzeko arloan zazpi urtegi erabiliko dira, batzuk eginak eta beste batzuk proiektuan daudenak, horien artean Itoitz eta Esako presaren handitzea. Amaieran, 2015. urtean 31.000 hektarea finkatuko dira plangintza honen arabera. Ohizko ureztapenen berrikuntzari dagokionez, eta berrikuntza hau ureztapen berriak sortzea baino garestiagoa dela esan arren, 7.500 hektarea berrituko dira egitasmo honekin. Ureztapen berriek, berriz,

54.461 hektarea hartuko dituzte 20 urteren buruan, Planak azaltzen duenez. Horietarik 31.000 hektarea Nafarroako ubideari esker egingo dira. Hau, ordea, ubidearen lehen faseari soilik dagokio, Gobernuaren Ureztapen Plana 2015 urtera artekoa delako, eta ubidearen bigarren fasea 2042an amaituko da. Bigarren fase honetan beste 20.000 hektarea jarri nahi dira martxan.

Hau guztia egiteko, Nafarroako Gobernuak 75.874 milioi pezeta gastatuko ditu, fintzaketa Estatuak ere parte hartuko duelako. Diru kopuru hau 20 urteren buruan ordainduko da, urtero 3.794 milioiko partidetan banaturik. «Diru kopuru handia da, baina asumitu daiteke aurrekontuetan horren truke lanpostuak lortu eta garapena lortzen badugu», Lapazaranen irudikoz.

Ureztapen Plan hau egin eta Espainiako Nekazaritza Ministeriora bidali du Nafarroako Gobernuak, honek Ureztapenen Plan Nazionala egiterakoan lehentasunak aztertu eta izendatu behar baititu. Hidrologi Plangintza Nazionalak erabakiko du Estatu osoan ureztapenerako zenbat hektarea berri jarriko diren martxan, eta kopurua zehaztu ondoren Ministerioak komunitateetako lehentasunak markatuko ditu. Sailburuak azaldu zuenez, «gure planak garantia nahikoa du lehentasunen artean sartu ahal izateko». Gaia, ordea, Ministerioaren esku dago eta eze-rezean gera daiteke, beste komunitateetatik ere presio handiak jasoko baititu.

Atzoko agerraldian Lapazaranek hainbeste datu berri eman zituen oposizioko alderdiek heldu den astera atzeratu zuten galderak egiteko aukera.



Jose Cruz Perez Lapazaran Nafarroako Nekazaritza sailburua. LACALLE

Errentagarritasun ikerketak

T. S. / IRUÑEA

■ Nafarroako ubidearen ingurugiro azterketa oraindik egin gabe badago ere, Jose Cruz Perez Lapazaran Nekazaritza sailburuak azken urte hauetan egin diren ubidearen errentagarritasun ikerketa batzuen berri eman zuen atzo eginiko agerraldian. 1986an, 1993an eta 1994an MOPTMAk eta Riegos de Navarra elkarteak egindako ikerketak izan dira Nafarroako ubidea-

ren errentagarritasuna aztertu dutenak.

Hiru ikerketen arabera, Nafarroako ubidearen errentagarritasuna nabaria da Lapazaranen ustez. Zehazki, abantaila hauek ekarriko lituzke: populazioaren hazkundera, lanpostuen gorakada, BPGren handitze prozesua, Foru Administrazioako sarreraren gehikuntza, herrialdeko zonaldeetako biztanleria orekatuagoa eta produktu barietate handiagoa.

Hego-haizearen eraginez sute txikiak gertatu dira Gipuzkoan

DONOSTIA

Azken orduetan sute txiki ugari gertatu dira Gipuzkoako mendietan, baserritarrek erretzen jarritako sasiak eta hego-haizeak eraginda. Zehazki Erreterian, Elgoibarren, Orion, Aian eta Azpeitian izan ziren suteak, asteazken eguerdian hasita. Nolanahi ere, sute guztiok txikiak izan dira eta ez dute kalte handirik sortu.

Gipuzkoako Mendi Zerbitzuek jakinarazi dutenez, guztietatik itzaltzeko lan gehien eman duen sutea asteazken gauerdia pasatxo zela piztu zen Erreteria Alduna mendian, eta goizaldeko hirurak arte suhiltzaileek ez zuten amatatzeko modurik izan.

Elgoibarren, erretzen jarritako sastrakek sutea sortu zuten San Agustin izeneko parajeetan. Inguru hori oso arbola gutxiko mendialdea da. Atzo goizaldeko 02.00etan lortu zuten itzaltzea, Diputazioako ibilgailu bat laguntzera bertaratu eta gero.

Beste sute txiki bat, Orioko Mendizorrotz inguruan gertatu zen atzo goizeko zortziak baino lehentxeago. Hamaiketarako itzalia zegoen, ordea, Zarauzko suhiltzaileei esker. Sute honen arrazoiak ere baserritarren batek erretako sasiak izan dira agi danek. Hego-haizea baretu arte, sasiak erretzea galarazi du Diputazioak.

INGURUGIROAZ BETE-BETEAN



INGURUGIROARI
BURUZKO
NAZIOARTEKO
AZOKA

Bilbo, 1995eko martxoak 22/25

Antolakuntza eta informazioa:

FERIA
INTERNACIONAL
DE BILBAO

BILBOKO
NAZIOARTEKO
ERAKUSTAZOKA

Posta Kutxatila 468 - 48080 BILBO - TF. (94) 427 72 00 - Telex 32617 FIMB-E - Fax (94) 442 42 22

EUSKO JAURLARITZA

GOBIERNO VASCO

IBERIA
LINEAS AEREAS DE ESPAÑA
Garraiolan Ofiziala

CDI

IHDUNALDI TEKNIKOA

- Ingurugiroari buruzko V. Foruma.
- Ingurugiro-ingeniaritzari buruzko IV. Biltzarra.

PROMA'95en 500etik gora erakuslek ingurugiroarekin zerikusia daukaten arloetan airea, ura, hondakinak, akustika eta inguruarekiko eragina sor daitezkeen arazo eta beharizanetarako erantzun eta konponbidea eskaintzen dituzte. Ingurugiroaz zer esan edo zer eskaini daukaten guztiak PROMA'95en daude.